

Samningur

mennta- og menningarmálaráðuneytis við Austurbrú ses um ráðstöfun rekstrarframlags í fjárlögum 2014 - 2016

Mennta- og menningarmálaráðuneyti, kt. 460269-2969, í samningi þessum nefnt ráðuneyti, og Austurbrú ses, kt. 640512 0160, gera með sér svofelldan samning um starfsemi og þjónustu Austurbúar ses á starfssvæði sínu sem nær frá Vopnafirði í norðri til Djúpavogshrepps í suðri.

1. Markmið og starfsemi

1.1. Meginmarkmið með samningi þessum eru að:

- mæta fræðsluþörf íbúa og atvinnulífs með framboði og miðlun náms.
- afla þekkingar og viðhalda, miðla henni og hagnýta á starfssvæðinu
- stuðla að auknu samstarfi og samþættingu menntunar, rannsókna, fræðastarfs, menningarstarfsemi og atvinnuþróunar.
- sinna þörfum íbúa og atvinnulífs í dreifðum byggðum að því leyti sem búseta takmarkar tækifæri til náms.

1.2. Starfsemi

• Símenntun og framhaldsfræðsla.

- Vinna að markmiðum framhaldsfræðslulaga nr. 27/2010 með því að greina þarfir og bjóða upp á ráðgjöf, raunfærnimat og námskeið fyrir einstaklinga með stutta formlega skólagöngu að baki sbr. a. lið 1. mgr. 3. gr. framhaldsfræðslulaga. Þjónusta á sviði framhaldsfræðslu skal veitt og þróuð í samstarfi meðal annars við Fræðslumiðstöð atvinnulífsins, Fræðslusjóð, aðra framhaldsfræðsluaðila, framhaldsskóla, stéttarfélög, fagfélög, sveitarfélög og fyrirtæki á svæðinu. Miðað er við að sem næst 30% framlags skv. samningi fari í reglubundinn rekstur framhaldsfræðslu sbr. 9. gr. laga um framhaldsfræðslu.
- Starfrækja miðstöð símenntunar og framhaldsfræðslu, m.a. með því að halda úti námsþjónustu og kennsluáðstöðu á Egilsstöðum, Neskaupstað, Reyðarfirði og Vopnafirði og eftir þörfum á öðrum stöðum á starfssvæðinu. Umfang þjónustu og aðstöðu á hverjum stað fer eftir því sem þörf er á og fjárhagur leyfir.
- Veita námsráðgjöf og stuðning við nema og einstaklinga sem hyggja á nám.
- Vinna með fyrirtækjum, sveitarfélögum og stofnunum við mótun símenntunarstefnu þeirra og sérsníðinna námsleiða.

• Háskólanám/fjarnám.

- Að vera miðstöð háskólanáms, m.a. með því að halda úti háskóla- og fjarnámsþjónustu á starfsstöðum sínum. Umfang fari eftir því sem þörf er á og fjárhagur leyfir.

- Veita nenum á framhaldsskóla- og háskólastigi þjónustu t.a.m. með miðlun fjarfundakennslu, fjarprófahaldi og með því að halda úti les- og vinnuádstöðu fyrir fjarnema.
- Vinna að bættri þjónustu við íbúa í formi fjarkennslu og staðbundins náms m.a. með þróun námsleiða og/eða námskeiða á háskólastigi í samstarfi við háskóla, sérfræðinga og þekkingarsetur á svæðinu.
- **Rannsóknir og þróun.**
 - Hafa frumkvæði að rannsóknar- og þróunarverkefnum sem byggja á sérstöðu í náttúrufari, atvinnulífi og/eða menningu svæðisins.
 - Byggja upp og viðhalda þekkingu á samfélagi og byggðum Austurlands og hagnýta þá þekkingu í rannsóknastarfi.
 - Vinna að rannsóknar- og þróunarverkefnum sem byggja á sérstöðu svæðisins.
 - Taka virkan þátt í faglegri umræðu um þróun rannsókna og háskólastarfs.
 - Vinna með sérfræðingum og þekkingarsetrum á svæðinu að þróun verkefna og stefnumótun háskóla- og rannsóknarstarfs. Aðstoða fræðimenn við að koma á tengslum og útvega sér aðstöðu.

2. Forsendur samnings og lagaheimildir

- 2.1. Framlag ríkisins til samnings þessa er ákveðið í fjárlögum hvers árs.
- 2.2. Ráðuneytið annast samskipti aðila vegna samningsins við fjármálaráðuneyti og Alþingi. Það mun beita sér fyrir því að árlegt framlag til samningsins verði í samræmi við gr. 2.1. með fyrirvara um að Austurbrú ses standi við skuldbindingar sínar. Gerður er fyrirvari um að stjórnvöld kunna að ákveða aðhaldsaðgerðir við samþykkt fjárlaga og á Austurbrú ses ekki kröfu á ríkissjóð eða rétt á bótum þótt framlag til samningsins verði lækkað eða fellt niður.
- 2.3. Verði gerð umtalsverð breyting á fjárveitingu til samningsins í fjárlögum taka aðilar upp viðræður um aðlögun rekstrarins að breyttri fjárveitingu.
- 2.4. Framlag ríkisins skv. samningi þessum tekur breytingum samkvæmt verðlagsuppfærslu fjárlaga hvers árs.
- 2.5. Austurbrú ses starfar samkvæmt skipulagsskrá sem var samþykkt var á stofnfundi 8. maí 2012.
- 2.6. Austurbrú ses starfar í samræmi við lög og reglugerðir sem gilda um umsamda starfsemi og verkefni, en einnig, eftir því sem við á: eftir lögum og reglugerðum um rekstur aðila sem kostaðir eru að verulegu eða öllu leyti af framlögum ríkisins.
- 2.7. Forsenda framlags til verkefna á sviði framhaldsfræðslu er að Austurbrú ses hafi viðurkenningu sem fræðsluaðili skv. 7. gr. laga um framhaldsfræðslu nr. 27/2010.

3. Ábyrgð styrkþega

- 3.1. Austurbrú ses ber ábyrgð á starfsemi sem samningur þessi tekur til og að hún fullnægi kröfum um fagmennsku og gæði. Austurbrú ses skal geta lagt fram gögn og skýrslur þessu til staðfestingar, sé eftir því leitað.
- 3.2. Austurbrú ses ber ábyrgð á skuldbindingum sem það eða aðilar á þess vegum stofna til í tengslum við samning þennan.
- 3.3. Austurbrú ses er óheimilt að:
 - 3.3.1. Afhenda, án skriflegs samþykkis ráðuneytisins, réttindi sín og skyldur samkvæmt samningi þessum í hendur þriðja aðila.
 - 3.3.2. Framselja greiðslur skv. samningi þessum til þriðja aðila og setja með öðrum hætti til tryggingar fjárskuldbindingu skv. 45. gr. laga um samningsveð nr. 75/1997.

4. Upplýsingar, samskipti og eftirlit vegna fjármála

4.1. Ráðuneytið greiðir árlegt framlag sem hér segir:

4.1.1. Í tólf jöfnum hlutum og er miðað við að greiða fyrsta dag hvers mánaðar.
Greitt er inn á bankareikning í viðskiptabanka Austurbrúar ses.

4.2. Austurbrú ses skilar ráðuneytinu:

4.2.1. Áætlun um rekstur Austurbrúar ses ásamt starfsætlun, þar sem fram komi m.a. hvernig er áætlað að ráðstafa framlagi og helstu starfsmarkmið sem unnið verður að, fyrir lok janúar ár hvert.

4.2.2. Endurskoðaðan ársreikning ársins á undan með skýringum, fyrir lok júní ár hvert.

4.3. Eigi Austurbrú ses í viðskiptum við lögaðila sem það á eignarhluta í eða er í eigu fjárhagslegra tengdra aðila svo sem stjórnenda hans, eða annarra aðila, skulu þau fara fram á viðskiptalegum forsendum og gerð grein fyrir þeim í ársreikningi.

5. Upplýsingar, samskipti og eftirlit vegna verkefna

5.1. Ráðuneytið hefur eftirlit með framkvæmd samningsins.

5.2. Fulltrúar ráðuneytis og Austurbrúar ses funda að lágmarki árlega um samninginn.

5.3. Fyrir lok júní ár hvert skilar Austurbrú ses ráðuneytinu stuttri greinargerð um framkvæmd samningsins.

5.4. Austurbrú ses skilar ráðuneytinu upplýsingum sem það kallar eftir vegna opinberrar upplýsingagjafar.

5.5. Austurbrú ses veitir ráðuneytinu upplýsingar sem það kallar eftir vegna eftirlits með framkvæmd samningsins. Ráðuneytið hefur heimild til að gera sjálft eða fela öðrum að gera athuganir og úttektir á öllum eða einstaka þáttum í framkvæmd samningsins. Í því sambandi hefur það óheftan aðgang að öllum gögnum sem máli skipta, þar á meðal fundargerðum, skrám, fylgiskjölum, skýrslum, bókunum og bréfum.

5.6. Samning þennan, ársreikning Austurbrúar ses, greinargerð um framkvæmd samnings og úttektarskýrslur skal birta á vef Austurbrúar ses jafnóðum og þessi gögn liggja fyrir. Ráðuneytinu er heimilt að birta gögnin á vef sínum.

5.7. Austurbrú ses setur á vefsíðu sína ýmis gögn sem eru efnislegar afurðir verkefnisins, svo sem skýrslur, leiðbeiningar og áætlanir.

6. Vanefndir og meðferð ágreinings

6.1. Austurbrú ses tilkynnir ráðuneytinu tafarlaust ef það telur vafa leika á um að það geti uppfyllt skyldur samkvæmt samningnum. Jafnframt greinir stofnunin frá úrræðum sem hún hyggst grípa til.

6.2. Ráðuneytinu er heimilt að draga úr greiðslum, stöðva greiðslur og endurkrefja um greiðslur uppfylli Austurbrú ses ekki skyldur sínar samkvæmt samningi þessum.

6.3. Samningsaðilar munu leitast við að jafna ágreining, ef einhver er, sín á milli.

6.4. Dómsmál sem rísa kann út af samningi þessum skal rekið fyrir Héraðsdómi Austurlands.


7. Gildistími og lok samnings


7.1. Samningurinn gildir frá 1. janúar 2014 til 31. desember 2016.

7.2. Hvor aðili um sig getur óskað eftir því að einstök ákvæði samnings þessa eða samningurinn í heild verði tekinn til endurskoðunar, enda séu færð fyrir því efnileg rök. Endurskoðun skal þá hefjast svo fljótt sem verða má.

- 7.3. Óski annar hvor samningsaðila að semja um áframhald eftir gildistíma samningsins skal hann koma því á framfæri fyrir lok febrúar það ár sem samningurinn rennur út.
- 7.4. Óski annar hvor aðila eftir að segja samningnum upp skal það gert skriflega með þriggja mánaða fyrirvara
- 7.5. Samningur þessi er gerður í tveimur samhljóða eintökum og heldur hvor aðili eintaki.

Reykjavík 26. nóvember 2014


Mennta- og menningarmálaráðuneyti


Austurbrú ses